

## Efesa

<sup>1</sup> Mini Polo, Jesu kilisiti tondo kelima U Tienu yanbuama po, n diani li tili ki fuondi yinba yaaba n tie bi nigagidiŋanba leni bi nidugikaaba ki ye Efesa. <sup>2</sup> Ti ba U Tienu leni ti diedo Jesu kilisiti ŋanbili leni o yanduanma n ya ye leni yi. <sup>3</sup> Tin pagi U Tienu yua n tie ba, ti diedo Jesu kilisiti ya ba. Wani n seligi ti U Tienu fuoma sela buoli kuli kilisiti nni tonpoli po. <sup>4</sup> U Tienu den tuodi ki ki gandi ti kilisiti nni ŋali ke ŋanduna daa tagi, ke tin yaa tie yaaba n gagidi ki ŋani, kaa pia tagiliba kuli o nuntuali. o buama yaapo, <sup>5</sup> o den tuodi ki bili ke tin ba mu bimoanmu bali kelima Jesu kilisiti yaapo. O yanbuama leni o yanjagili yaapo yo ke o den tieni yeni. <sup>6</sup> Lanwani tin ya paki o ŋanbili yaali n pia ti kpiagidi, wan puni ti yaali kelima o bijabuadiga po. <sup>7</sup> O yaa niinne ke ti ba mi daafaabima kelima o soama yaapo leni ti tuonbiadi sugili nani o ŋanbili n yaba maama po. <sup>8</sup> U Tienu den jiini laa ŋanbili tipo ke li yaba ki puni ti mi yanfuoma leni mi bandima kuli. <sup>9</sup> O den doagidi tipo mi yanduanma bondoaginkaala wan den tuodi ki bili ya yanjaginanli kilisiti nni. <sup>10</sup> Lani n tie ke u yogunu ya pundi wan taani li bonla kuli, yaala n ye tanpoli po leni yaala n ye ŋanduna nni kuli ke likuli n tua yenma, ke kilisiti n ya die likuli <sup>11</sup> Li tie wani kilisiti ya niinne ke ti tua bi faajieba. U Tienu den tieni li bonla kuli nani wan den kpa jagi ki bili maama. O den gandi ki gagidi ti ke tin tua o yaaba. <sup>12</sup> O

den tieni yeni ke tinba yaaba n den kpa bili ti suginma kilisiti nni n yaa pagi o. <sup>13</sup> Yi moko n den gbadi i moamoani maama lani n tie o laabaalinamo n cuani ya tindima. Yi den tuo ki daani kilisiti, o yaa nii nne ke U Tienu den tieni yipo mi maalima, lani n tie o fuoma yua wan den niani u ñoanianu ke o baa pa ti yua. <sup>14</sup> U Tienu fuoma yua yeni tie tipo mi maalima U Tienu diema ñalimani po, yaala n doagidi ke U Tienu ba faabi ti cain ke tin ya pagi o kpiagidi. <sup>15</sup> Li tie lanyapo ke mini moko n den gbadi ke bi maadi yi dandanli o diedo po maama leni yi buama bi nigagidinamba po, <sup>16</sup> n tuondi U Tienu yipo kaa cedi ki taagi yikuli yela n jaadi nni. <sup>17</sup> Ti diedo Jesu kilisiti Tienu, wani baa yua n pia ti kpiagidi n teni o fuoma yua n yendi yi yantiana ki go doagidi yipo U Tienu yin bandi o moamoani. <sup>18</sup> N go miadi o ke wan yendi yi yantiana nuni ke yin fidi ki bandi yaa suginma n tuugi leni o yiinu, leni wan bili bi nigagidinamba po ya ñalimani ke yi pia ti kpiagidi. <sup>19</sup> N go miadi o ke yin bandi o paaciamu yu n tuuni tinba yaaba n dugi po ya niinni n yaba ñali ke li yaba maama, <sup>20</sup> o paaciamu yu n tuuni ti niinni yeni tie wan den soani leni yu ki fiini kilisiti bi tinkpiba siiga ke o go ye ki fo, ki kaani o jienu tanpoli po. <sup>21</sup> Wani kilisiti ka lankani ki die mi diema danba leni li bali danba, bi paatieba leni bi diediba kuli, o yeli cie a yela kuli ya yogunu n tie na leni ya yogunu n ba ti cua kuli. <sup>22</sup> U Tienu bili li bonla kuli wani kilisiti taana tiipo ke o die la, ki go teni ke o tie wan yini yaabakuli yudanciamo. <sup>23</sup> Kilisiti n yini yaaa yeni tie o gbannandi, ki tie o yedagidikaama

wani yua n dagidi bi kuli po, li bonla kuli nni.

## Dianciamou 2

<sup>1</sup> Mi kpiama yi den tie yaaba n kpe kelima yi tagili leni yi tuonbiadi po. <sup>2</sup> laayogunu yi den nua nanduna yema sanbiadu, leni mi fawaama nni paaciamu bado, yua yaa yantiali n tuuni yaaba n yiedi U Tienu pala nni. <sup>3</sup> Ti kuli den kpa tie yeni ki tiendi nani laa niba n tiendi maama moala, ki nua ti gbannandi bon buakaala, ki tiendi ti gbannandi leni ti yantiana nbua yaala kuli. Ti den mali ki tie U Tienu pali n be yaaba yaapo nani bi nisaali kuli yeni. <sup>4</sup> Ama U Tienu ninjigbadima yaba o bua ti nali boncianla. <sup>5</sup> Lanyaapo tin den tie bi tinkpiba kelima ti tagili po, o den puni ti li miali leni kilisiti, li tie kelima nambili paabu yaapo ke yi tindi. <sup>6</sup> O taani ki fiini ti leni kilisiti ki duoni ki kaani ti leni o tanpoli diema nni, wani Jesu kilisiti ya niinni. <sup>7</sup> O den tieni lankuli ki baa doagidi o nambili n yaba kaa pia bianu maama nali yaa yogunu n baa cua, kelima o nanma tipo Jesu kiliti nni. <sup>8</sup> Li tie li nambili paabu yaapo ke yi tindi, yi baa la kelima li dandanli yaapo, laa nani yi yaa kani, li tie U Tienu paabu. <sup>9</sup> Laa tie a tuona po ba waamu ke oba kuli n da kpiagi o yuli lipo. <sup>10</sup> Ti tie U Tienu nu tuonli, o tagi ti Jesu kiliti nni ke tin yaa tiendi a tuonhama, wan den tuodi ki jagi ke tin ya tuuni ya. <sup>11</sup> Yin tiadi mani line, yi den mali ki tie nilanba, ban yi yaaba a junga kelima bi niba n tieni bi yaala den yini yi a jifola, <sup>12</sup> laayogunu yi den foagi leni kilisiti, yii den pia liba Isalele buolu yaaba

diema nni. Yi den tie canba leni U Tienu n den pia ya nantaado leni Isalele buolu yaaba, yaala n nua wan den niani ba ya ñoanianu. Yi den ye nanduna ne niinni kaa pia suginma ba kuli, kaa pia nantaado leni U Tienu. <sup>13</sup> Ama moala Jesu kilisiti nni, yinba yaaba n den kpa ye foagima yeni yi nagini U Tienu kani kelima Jesu kilisiti yaa soama po. <sup>14</sup> Kelima Kilisiti n tie ti yanduanma, o taani nibuoli lie, jufinba leni bi nilanba ke bi tua niboyendu. O den puni o gbannandi ki mudi yaa goanli n den paadi ti leni ti yaba lani n tie ti yibalindi yeni. <sup>15</sup> O den bolini li bali maama leni man den pia yaa kuana kuli ki taa laa nibuoliedi ki tagi nibuoyendu wani oba ya niinni ki tieni mi yanduanma. <sup>16</sup> O den tieni yeni ki baa teni ban mangi leni U Tienu, ki tua niboyendu kelima li dapoanpoanli po, wan den bolini ti yibalindi naani. <sup>17</sup> Wani kilisiti den cua ki wangi mi yanduanma yaa laabaalinjamo, yinba yaaba n den ye foagima leni yaaba n den ye koama nni. <sup>18</sup> Kelima wani yaapo ti kuli pia u sanu ki baa fidi ki pundi Baa kani, fuoma yenma nni. <sup>19</sup> Lanwani yii go tie nilanba leni canba ka, yi ji tie tanpoli diema yaaba ki ta buolu leni U Tienu nigagidinanba, ki tie U Tienu deni yaaba. <sup>20</sup> Yi tie nani a tanmaakaana yeni, ki bi nuanu yi ya tanpuuli n tie U Tienu tondiba leni bi sawalipuaba po. Jesu kilisiti wani oba n tie laa tanpuuli tanjigi. <sup>21</sup> O ya niinne ke laa dieli ma bonhanla ki kpedi ki tua U Tienu dieli yaali n gagidi ki nani opo. <sup>22</sup> Bi nuanu yi moko o ya niinne ke yi taani ki tie U Tienu yekaanu kelima o fuoma nni.

## Dianciamou 3

<sup>1</sup> Lanwani, mini Polo yua n tie Jesu kilisiti kadibiga yinba bi nilanba po... <sup>2</sup> Yi gbadi U TINU n tieni n po ya n̄nbili ke min boagidili leni yi. <sup>3</sup> Li tie U TIENU doagidima po yo ke yi bandi la bondoaginkaala, nani min diani yi po maama waamu. <sup>4</sup> yi ya cogi yi ba fidi ki bandi min ga maama ki bandi kilisiti bondoaginkaala. <sup>5</sup> Hali puolipo ya nifiima n pendi, U TIENU ki den doagidi bi nisaaliba po laa bondoagindikaala, nani o fuoma n doagidi la o tondiba leni o sawalipuaba yaaba n gagidi o po maama. <sup>6</sup> Laa bondoanginkaala tie line, kelima o laabalinamo po bi nilanba leni jufinba taani ki baa U TIENU n̄nbili; bikuli taa leni biyaba gbananyendi nni ki ba uTIENU n̄oanianu. <sup>7</sup> U TIENU den n̄nbi n po ki puni nni ke min tua o labaalinamo nacemo kelima o paaciamu po <sup>8</sup> Mini yua n tie puoli yua U TIENU nigagidin̄nba kuli siiga, n den ba laa n̄nbili ki baa wangi bi nilanba o labaalinamo yua n doagidi kilisiti piama yaama n yaba ki kandi, <sup>9</sup> ki go teni ke n doagi la bi niba kuli po laa bondoaginkaala n ba tie maama U TIENU yua n tagi li bonla kuli, wuoni li bondoaginkaala yeni n̄ali ya yogini n kpela, <sup>10</sup> ki bua moala, kelima kilisiti n yini yaaba po i paaciami danba leni li bali danba yaaba n ye tanpoli po n bandi U TIENU yanfuoma yaama ya buolu n yaba, <sup>11</sup> U TIENU n den jagi ke oba tieni yaala n̄ali yogunu ke o tienla ki dudi kelima ti diodo Jesu kilisiti yaa po. <sup>12</sup> Oya ni nne ke ti fidi ki nagini U TIENU kani leni ti dugidi kelima tin pia ya dandanli

opo yaapo. <sup>13</sup> Lanwani n mia yi ke yin da luo li papaali kelima min laadi ya fala yipo, kelima li ba tie yi po kpiagidi. <sup>14</sup> Li tie lani yapo ke n gba baa kani. <sup>15</sup> Diegu kuli baadi ku yeli, nani tanpoli leni ki tinga nni. <sup>16</sup> N mia wani UTIENU wan pa yi nani o kpiagidi piama n yabi maama ke o fuoma n ya ye ki tuuni yi ni nni leni yi paaciami ke tin ya pa nali li pali tugu nni. <sup>17</sup> ke kilisiti n ya ye yi pala nni kelima li dandanli yaapo, n go mia ke wan pa yin ya pia i jiini leni i tanpuuli mi buama nni ki ya se ke lipa, <sup>18</sup> lani n tie yin fidi ki taani leni bi nigagidinba kuli ki bandi wani kilisiti buama n pia, ki foagi, ki nua, ki kpedi maama, <sup>19</sup> ke yin bandi kilisiti buama yaama n yabi ki pendu ytin ba fidi ki bandi yaala nali UTIENU yedagidikaama n gbie yi pala nni. <sup>20</sup> UTIENU yua n fidi ki tienidi yaala n yaba ki pendu tin miadi o yaala leni tin tia yaala kuli nali ke li kandi kelima o paacamu yu n tuuni ti ni nni yaapo. <sup>21</sup> Wan ya baadi ti kpiagidi kilisiti n yini yaaba siiga leni Jesu kilisiti yaapo nali nifima ki tuu nifima nali ya yogunu kuli.

## Dianciamou 4

<sup>1</sup> N tundi yi mini yua n tie ki kadibiga o Diodo nni, ke yin ya cuoni ki tiegi U TIENU n yini yi ya yiinu nni. <sup>2</sup> yin ya ye leni yi yaba leni li yumiinli, mi dingima leni li juunli ki ya todi yi yaba leni mi buamoanma. <sup>3</sup> Yin paagi yiba ki kubi mi fuoma taanyenma yaama n tuugi leni mi yanduanma . <sup>4</sup> Gbananyendi bebe n ye, mi fuoma moko tie bonyenma, yeni moko suginyenma n ye U TIENU

n den yini yaama ya po. <sup>5</sup> o Diodo yendo bebe n ye, li dandanli tie bonyenli, mi batisima mo tie bonyenma; <sup>6</sup> TIENYENDUbebe n ye yua n tie BAA tikuli po, ki die li bonla kuli ki ye tikuli siiga, ki go ye tikuli ni nni. <sup>7</sup> Ama ti siiga yuakuli den baa li njanbili paabu nani kilisiti n puni yuakuli maama. <sup>8</sup> Li tie lani yapo ke li yedi: wan den doni tanpoli, o den taa a kadibila, ki go puni bi nisaaliba bu paabu. <sup>9</sup> Lanwani be n tie: o doni nali tanpoli? li bua ki yedi ke o den kpa jidi hali ki tinga tiipo. <sup>10</sup> Wan yua n den jidi yeni tie yua n den doni ki pemdi nali tanpoli, ki ba gbieni li bonla kuli. <sup>11</sup> O puni bi tianba ke ban ya tie tondiba, bi tianba nani sawalipuaba, bi tianba nani o labaalijamo wangikaaba, bi tianba bi yankpaaba leni bi bangikaaba. <sup>12</sup> O den tieni yeni ki bua ki ya njanbidi o nigagidikaaba po cain, ki boginiba ban ya tuuni ki teni wani kilisiti gbanandi n ya kpedi ki pugidi, <sup>13</sup> nali tikuli n baa ya taanyenma n ye li dandanli nni, leni U TIENU bijua ya bandima, ki tie yaaba n kpedi ki dagidi cain nani kilisiti n dagidi cain maama. <sup>14</sup> Lanwani ke tin da tie nani a biwaala yeni ki lengidi kelima bi niba nunfanbiadibu leni bi boandi n kpendi nni ya bangima po, <sup>15</sup> ama ti ya maadi i moamoani leni mi buama ti baa yabidi ki pugidi li bonla kuli nni, kilisiti nni wani yua n tie li yuli. <sup>16</sup> Li tie o ya todima po yo, ke ti gbanandi taa ki tuugi yenma, kelima ti tuga kuli kubi ti ke li pa bonanla. yeni yaapo ti kpedi kelima gbananbuolu kuli yuuni u tuonli nani lan punidi maama, ki njanbidi tiba mi buama nni.

<sup>17</sup> Lanwani min yedi yi yaala leni min kadi ki waani yi yaala o diodo nni tie: ke yin da go cuoni nani bi nilanba n cuoni ya sani nni, bani yaaba n nua bi yantiana yaa n tie fanma fanma yeni. <sup>18</sup> Bi pia ya yama n biigi, ki tie canba U TIENU miali po kelima ya yanpiima n ye bi ni nni leni bi pajuaga po. <sup>19</sup> Ba go bani i fe n tie yaala ki puuni bi yula mi conconma po ki baa tiendi ti joagindi buoli kuli ke li tuugi leni mi ligibuabiadima. <sup>20</sup> Ama yinba wani, yii den bandi kilisiti yeni ka; <sup>21</sup> yi den gbadi o maama, bi den bangi yinba yaaba n daani ya moamoani n ye JESU nni, <sup>22</sup> lani n tie ke yin da go tie nani yin den kpa tie maama, ama yuakuli n landi o tagikpelu nani li liadili yeni, o yanbuabiadima n den biidi yu. <sup>23</sup> Yin baa mani li yantiapanli mi fuoma nni; <sup>24</sup> yin la mani u tagipaanu yu n tagi nani U TIENU n bua maama, ki nua i moamoani n kpendi nni ya teginma leni ya gagidinambima. <sup>25</sup> Lani yapo, yin cedi mani mi faama, ke yi siiga yuakuli n ya maadi o nisaalilielo i moamoani, kelima tikuli tie gbananyendi yaaba. <sup>26</sup> Yi pala ya fii, yin da tieni ti tuonbiadi; ki da tuo ki yenga nkua ke yi pala ki jiidi. <sup>27</sup> Yin da pa sutaani u kaanu yi pala nni. <sup>28</sup> Yua n den su n da go go su; ama wan ya tuuni li tuonli ke li nani ke wan fidi ki pa a luada ban bua yaala. <sup>29</sup> Mabiadima ba kuli n da na yi noana nni, ama li ya ba tuo, yin ya maadi ya maama n nani ki ba cuani mi findima leni li seli yaaba n gbadima kuli po. <sup>30</sup> Yin da biidi U TIENU fuoma yua pali nni wan yua n tie yi po mi maalima ki doagidi ke yi dafaabima nagini. <sup>31</sup> Yin cedi



mani li mutuoli, ki nanga, li pabienli, ku fuugu, ku tuotabigu, leni mi biabidima buolu kuli n ña yi siiga. <sup>32</sup> Yin ya mani leni yi yaba ki gba yi yaba po mi niñima, ki puuni yi yaba sugili, nani U TIENU n den tieni yi po sugili kelima kilisiti nni po maama.

## Dianciamou 5

<sup>1</sup> Lanwani yin ya ñua mani U Tienu fuuli nani o bibuadimu yeni. <sup>2</sup> Yin ya ye leni yaba leni mi buama nani Kilisiti n den bua ti maama yeni ki puni o yuli U Tienu ki tua yaa paabu leni ya padili ya nuulu n mani. <sup>3</sup> Yin da tuo mi conconma maama leni majoagindi buolu ba kuli bi mi ligibuama maama n ña yi siiga ba waamu, kelima laa dagidi yinba bi nigagidinanba po. <sup>4</sup> Yin yaa kubi mani yi yula yi maama nni ki da maadi mi cacaginmaama leni mi gaadi maama leni o faajibiado kuli. Ama yin yaa tuondi mani U Tienu. <sup>5</sup> Yin bandi mani ke ba niyendo yua n tie mi conconma daano leni yua n tiendi ti joagindi leni yua n bua i ligi ke li tie opo nani i buli ñoadima yeni, kan ba U Tienu leni Kilisiti diema ñalimani. <sup>6</sup> Oba kuli n da boandi yi leni mi mafanma. Li tie lani yaa po yo ke U Tienu pabienli baa cua yaaba n yie o kuli po. <sup>7</sup> Lani yaapo yin da pia ñantaado ba kuli leni ba. <sup>8</sup> Yi den kpa ye li biigili nni moala yi tie mi yenma O diedo nni, ya cuoni mani nani mi yenma bila yeni. <sup>9</sup> Kelima mi yenma n ba luoni yaa bonluonkaala tie li ñanbili; mi ñanma, mi teginma leni i moamoani. <sup>10</sup> Yin biigi ki

bandi yaala n baa mani O diedo po, <sup>11</sup> ki da pia nantaado ba kuli leni li biigili tuona, yaa n kaa pia fuoma, ama yin waani ke a bia. <sup>12</sup> Kelima li pia ife, ba ki maadi ban tiendi yaala nasiili nni. <sup>13</sup> Bi ya doagidi laa niba n tieni ya bonbiadila mi yenma nni, mi yenma baa doagidi lan bia maama kelima mi yenma doagidi li bonla kuli. <sup>14</sup> Lani yaapo ke li yedi njan fundi fini yua n goa, njan fii bi tinkpiba siiga. Kilisiti baa yendi apo. <sup>15</sup> Lani yaapo, yin fangi mani yi yula leni yi tagi n tie maama. yin da tie nani bi yanluodanba, ama yin yaa tie nani bi yanfodanba yeni. <sup>16</sup> Yin da u yogunu kelima yaa dana n tie na bia. <sup>17</sup> Lani yaapo yin da tie yanluodanba yin ya fani mani ki moandi ki bandi o diedo yanbuama. <sup>18</sup> Yin da ño mi daama ki gaadi, li baa teni yin joagini ama yin yaa gbie leni U Tienu Fuama yua. <sup>19</sup> Lani, yi baa maadi leni yi yaba ki togidi Pisominba leni yaa yani n pagi U Tienu, leni U Tienu fuoma yua n gobidi yi ke yi yiini ya yani. Yaa yiini mani ki pagi O diedo leni yi pala kuli. <sup>20</sup> Yaa tuondi mani U Tienu yua n tie Baa yogunu kuli li bonla kuli po ti diedo Jesu kilisiti yeli po. <sup>21</sup> Yin ya miindi mani yi yula yi yaba kani kelima yin pia Kilisiti po yaa fangili yaapo. <sup>22</sup> Yinba bi puoba, yua kuli n yaa miindi o yuli o calo kani nani wan miidi o yuli O diedo kani maama. <sup>23</sup> Kelima o joa tie opua yudaano nani kilisiti n tie wan yini yaaba yudaano maama yaaba n tie o gbannandi wani n tie bi candaano. <sup>24</sup> Nani kilisiti n yini yaaba n miindi bi yula O diedo kani maama, li pundi ke bi puoba n yaa miindi bi yula bi ciaba kani li bonla

kuli nni. <sup>25</sup> Yinba bi jaba yua kuli n yaa bua opua nani Kilisiti n den bua wan yini yaaba maama ki puni o yuli ki kpe bi po. <sup>26</sup> O den tieni yeni ki baa nuudi ki njanbi ba leni mi ñima leni U Tienu maama, <sup>27</sup> ki teni ban pundi ki sedi o kani ki pia ti kpiagidi kaa pia joagindiba leni golimaba leni yaala n gundi kuli. Ama ban gagidi ki yaa nani cain kaa pia ban baa fidi ki kuli leni yaala. <sup>28</sup> Li pundi ke bi podanba moko n yaa bua bi puoba nani ban bua bi yula maama yeni. Yua n bua opua kuli bua o yuli. <sup>29</sup> Kelima oba naa nani o gbannanda, ama o dindi ti, ki kubi ti, nani kilisiti moko n kubi wan yini yaaba maama. <sup>30</sup> Kelima ti mo tie o yaa gbannandi buolu yo. <sup>31</sup> Li diani: li tie lani yaapo ke o joa baa ña leni o naa kani ki loli o yuli leni opua bani niba lie yeni n tua gbannanyendi. <sup>32</sup> Line n tie yaa bondoaginkaala n yaba n maadi laa maama Kilisiti leni wan yini yaaba yaa po yo. <sup>33</sup> Li mayuli yinba yaa po tie ke joa kuli n yaa bua opua nani wan bua o yuli maama, pua kuli mo n yaa fangi o calo.

## Dianciamou 6

<sup>1</sup> A bila yin tuo mani yi danba maama kelima o diedo bua lane lani n go tiegi mo. <sup>2</sup> Han kpiagi a ba leni a na, lani n tie ya balimakpiama n yegi leni u ñoanianu, <sup>3</sup> laa ñoanianu mo tie: a baa ye leni li pamanli, a miali dana mo n go foagidi ki tinga nni. <sup>4</sup> Yinba bi baanba mo yin da mabindi yi bila nali ki fiini bi pala. Ama yin wubi ba, ki tundi ba, ki gobidi ba nani o diedo n bua maama. <sup>5</sup> Yinba bi tuonsoanba yin tuo ki yaa nua yin

pia ya canbaanba ti gbannandi nni n yedi yaala leni i jeje leni mi dinginma nani yi pala n dingi kilisiti nuntuali maama yeni. <sup>6</sup> Yin da tiedi yeni ban nua yi ya yogunu bebe ka, nani yi bua ki ya mangidi bi nisaaliba ya pala yeni. Ama kelima yi tie kilisiti naacenba yin kuani yi yama lienni ki yaa tiedi U Tienu yanbuama. <sup>7</sup> Yin ya tuuni mani bipo leni li pamanli kelima yi tuuni o diedo po yo laa tie nusaalo po ka. <sup>8</sup> Yi bani ke nilo kuli baa ba o diedo kani wan den soani yaa tuonŋanli ya panpaani yeni wan tie naacemo bi wan die o yuli. <sup>9</sup> Yinba canbaanba mo yin ya tiendi yeni yi naacenba po. Yin da fu leni ba, kelima yi bani ke yinba leni bani kuli pia canbaanyendo tanpoli po yua n tiendi gagidima bi niba leni bi yaba siiga. <sup>10</sup> N majuodi kaama n tie na: yin yaa baadi mani yi fidu o diedo nni wani yua n tie u paaciamu ŋiali. <sup>11</sup> Yin bobi mani U Tienu n puni yi ya toatiadi kuli lani n tie yin fidi ki sedi lan yaa pa ki yie Sutaani nunfanbiadibu kuli po. <sup>12</sup> Kelima tii koani leni ti gbannandi leni mi soama ka, ama ti koani leni li bali danba, bi tie cicibiada ki tie li biigili tuonsoanba ki ye mi fawaama nni. <sup>13</sup> Lani yaapo, yin taa U Tienu toatiadi kuli, ki fidi ki paadi ya dana n bia kuli ki yaa se mi paadima nni. <sup>14</sup> Lanwani ya se mani ke li pa: yin ya ñaagi i moamoani nani ku gbanŋagidigu yeni. yin yaa la mi teginma nani ti kudi liadiga yeni. <sup>15</sup> Yin pili li yankuali nani ti cacaadi yeni mi yanduanma laabaalinamo wangima po. <sup>16</sup> Yin go ta li dandanli nani ku gbankoandigu yeni ki yaa muubi yogunu kuli, ke yin fidi ki gbindi

o biado n toa yi yaa mupiem. <sup>17</sup> Yin ya ciibi mani mi faabima kusanli leni mi fuoma jugisiega yaaga n tie U Tienu maama. <sup>18</sup> Mi fuoma n teni yin yaa jaandi yogunu kuli, ki yaa tiendi jaandi buoli kuli leni bu miabu. Yin ya pia li moandili ki se ke li pa boncianla, ki jaandi bi nigagidijanba kuli po. <sup>19</sup> Yin yaa jaandi mani npo, ke ya yogunu ke n yaadi n ñoabu kuli min fidi ki doagidi o laabaalinamo bondoanginkaala leni li papaali. <sup>20</sup> Mini yua n tie o laabaalinamo tondo ban loli yua li kadidieli nni. Yin yaa miadi o mani ke min fidi ki yaa wangi o laabaalinamo yeni leni li papaali nani lan pundi min yaa wangi o maama. <sup>21</sup> Lan baa ga maama yi moko n bandi min ye maama leni min tiendi yaala kuli, ti kpibuado Tikika yua n tiegi ki go tie o laabaalinamo naacendugikoa ba waani leni laa bonla kuli. <sup>22</sup> N soani o yi kani lani yaapo bebe, ke yin bandi ti yema n tie maama ke wani mo n paagi yi pala. <sup>23</sup> U Tienu yua n tie Baa leni O Diedo Jesu Kilisiti n pa ti kpiiba mi yanduanma leni mi buama leni li dandanli. <sup>24</sup> Li ñanbili n yaa ye leni yaaba n bua ti Diedo Jesu Kilisiti ya buama n kan lebidi ñali abada.

**Bible Gourma**  
**The New Testament in the Gourmanchéma language**  
**of Burkina Faso, Niger, Benin, and Togo**  
**Le Nouveau Testament en langue Gourmanchéma du**  
**Burkina Faso, du Niger, du Bénin et du Togo**

copyright © 2020 Door 43 world-wide mission community

Language: Gourma (Gourmanchéma)

Dialect: Central

Translation by: Door 43 world-wide mission community

Contributor: Gourmanchema, Wilson, gux4-ner, Jean Sandamba, Ouoba K. David, Parfait-Ayanou

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2022-06-16

---

PDF generated using Haiola and XeLaTeX on 13 Jul 2024 from source files dated 31 Aug 2023

1168f00b-eabf-5a7b-9fed-4d2120867558